

摘藻堂四庫全書薈要

集部

欽定四庫全書薈要

集部

梅溪集

廷試策
卷一

詳校官助教臣謝登雋



欽定四庫全書薈要

梅溪集總目

廷試策一卷

奏議四卷

詩文前集二十卷

詩文後集二十九卷

臣等謹案梅溪集五十四卷宋王十朋撰十

朋字龜齡樂清人紹興二十七年擢進士第

一歷官龍圖閣學士諡忠文事迹具宋史本傳是集為正統五年溫州教授何濬所校知府劉謙刻之黃淮為序凡奏議五卷而冠以廷試策前集二十卷後集二十九卷而附以汪應辰所作墓誌後有紹熙壬子其子宣教郎聞禮跋稱先君文集合前後併奏議五十四卷與此本合而文獻通考作梅溪集三十二卷續集五卷併載劉洪之序今無此序而

卷數多寡不符汪應辰墓誌則稱梅溪前後
集五十卷與此本亦不相應疑洪所序者初
稿應辰所誌者晚年續增之稿而此本則十
朋沒後其子聞禮聞詩所編次之定稿也觀
墓誌稱尚書春秋論語孟子講義皆未成書
而此本後集第二十七卷中載春秋論語講
義數條則為蒐輯續入明矣十朋立朝剛直
為當代偉人應辰稱其於文專尚理致不為

浮虛靡麗之辭其論事章疏意之所至展發
傾盡無所回隱尤條鬯明白珙稱其詩渾厚
質直懇惻條暢如其為人今觀全集淳淳穆
穆有元祐之遺風二人所言皆非溢美云乾
隆四十二年八月恭校上

總纂官臣紀昀臣陸錫熊臣孫士毅

總校官臣陸費墀

梅溪集原序

道在天下無物不備無時不然本之於民尋達之於事
業昭昭乎不可泯也然而不著之於文章垂之於訓典
曷足以扶世立教化今而傳後是故古之聖賢立德立
言不可偏廢也嗣是而繼作者世豈無其人歟溫郡梅
溪先生王公十朋家食時敏於力學博究經史旁通傳
記百家由博反約擇精守固其於天理民彝之懿忠孝
立身之本體認真切凝然以斯道自任紹興間對策大

廷日盈萬言援經證據切中時病高宗親擢首選試以
民事僉判紹興府自後厯官侍從臺諫出知饒夔湖泉
四大郡入為太子詹事以龍圖閣學士致仕每為權要
忌嫉而執德不回粵在侍從臺諫時屢上奏疏其於君
臣父子之大倫國家之權柄賞罰之當否時事之得失
臣僚之邪正衆論之是非民情之休戚軍政之利害時
幾之審決世讎之不可不復國恥之不可不雪剖析詳
明論議鯁直皆足以闡聖道垂世教惜乎當時不能盡

用也其為郡時布上恩恤民隱藁掖撫摩直欲底之於
平康之域身在外服而心存朝廷漢唐循吏殆不是過
其著為雜文詩歌率皆渾厚雅淳和平坦蕩不離於道
德仁義紫陽朱夫子謂其稟乎天者純乎陽德剛明之
氣是以其心光明正大踈暢洞達如青天白日而見於
事業文章者一皆如此確哉至論也蓋其當代之立德
立功立言可謂無媿者矣後之人雖欲無傳其可得乎
文集舊嘗鏤板歲久寢廢郡之前太守何公文淵訪於

其家得錄本若干卷殘缺錯亂不可緝理會陞除侍郎而去然其心未嘗忘也未幾前御史劉公謙繼守是郡旁求博訪乃得其刻本於黃巖士族蔡玄可家命郡學教授何濂重加訂正鳩工刊刻用廣其傳贊成其事者貳守徐公恕通判劉公寬推官宮公安暨邑宰周紀等與有力焉於乎公之心畏天憫世之心也公之道聖賢所傳之道也不幸沮於人事之變遷迫於氣運之衰微而不得卒就其志徒託空言於編簡之中其亦可悲也

夫披閱是編者因其言以求其心因其心而達諸用可
以致君為堯舜可以躋治於隆平使人皆知吾儒之道
有功於斯世豈曰小補云乎哉淮故不揆鄙陋而僭為
之序正統五年夏四月望日黃淮撰

欽定四庫全書薈要卷一萬五千八百三十二

集部

梅溪集廷試策

宋 王十朋 撰

御試策

問蓋聞監于先王成憲其永無愆遵先王之法而過者
未之有也仰惟祖宗以來立綱陳紀百度著明細大畢
舉皆列聖相授之模為萬世不刊之典朕纘紹丕圖恪
守洪業凡一號令一施為靡不稽諸故實惟祖宗成法
是憲是若然畫一之禁賞刑之具猶昔也而奸弊未盡

革賦斂之制經常之度猶昔也而財用未甚裕取士之
科作成之法猶昔也而人才尚未盛黜陟之典訓迪之
方猶昔也而官師或未勵其咎安在豈道雖久而不渝
法有時而或弊損益之宜有不可已邪抑推而行之者
非其人耶朕欲參稽典冊之訓講明推行之要俾祖宗
之治復見於今其必有道乎大夫學古入官明於治道
蘊畜以待問久矣詳著于篇朕將親覽

臣對臣聞有家法有天下法人臣以家法為一家之法人

君以家法為天下之法人君之與人臣雖名分不同而法
有小大之異至於能世守其法者則皆曰權而已人臣能
執一家之權守一家之法以示其子孫則必世為名家人
君能執天下之權守其家法以為天下法貽厥子孫而施
諸罔極則必世為有道之國蓋法者治家治天下之大具
而權者又持法之要術也今陛下親屈至尊廷集多士
訪治道于清問之中首以監于先王成憲恪守祖宗之
法為言是則陛下欲守家法以為天下法者固已得之

矣臣獲以一介草茅與乎大夫之列仰承聖詔其敢不
展盡底蘊茂明大對以為陛下遵祖宗守成法之獻邪
臣之所欲言者無他焉亦曰攬權而已嘗謂君者天也
天之所以為天者以其聰明剛健司慶賞刑威之權而
不昧也君之所以為君者以其能憲天聰明體天剛健
司慶賞刑威之權而不下移也天執天之權而為天君
執君之權而為君故天與君同稱大於域中而君之名
號必以天配以天道而王天下也則謂之天王以天德

而子兆民也則謂之天子居九五正中之位則謂之天
位享萬壽無疆之祿則謂之天祿五服五章者謂之天
命五刑五用者謂之天討就之如日者謂之天表畏之
如神者謂之天威居曰天闕器曰天仗法曰天憲詔曰
天語天之大不可以有加君之大亦不可以有加者以
其威能司域中之權而已矣恭惟陛下蘊聰明之德體
剛健之資躬親聽斷動法祖宗一詔令之下而萬民莫
不鼓舞者如天之雷風一德澤之布而萬民莫不涵泳

者如天之雨露開衆正之路杜羣枉之門而萬民莫不
 悅服者如天之清明為政日新日日新又日新而萬民
 莫不拭目以觀者如天之運行而不息巍巍乎蕩蕩乎
 固不可以有加矣而臣猶以法天攬權為言者蓋陛下
 之德雖不可以有加而臣子之心每以有加亡已而望
 陛下此臣所以昧死盡言而不知諱也臣伏讀聖策首
 以監于先王成憲其永無愆遵先王之法而過者未之
 有為言次及于祖宗立綱陳紀列聖相授之道又次以

今日奉行而不能無四者之弊為問臣有以見陛下知
致治之道在乎守成憲遵祖宗欲革今日之弊也臣竊
謂陛下能攬福威之權率自己出則成憲有不難守祖
宗有不難法時弊有不難革天下有不難治凡所以策
臣者皆不足為陛下憂矣不然陛下雖勤勤問之臣雖
諛諛誦之無益也臣觀自古善言治之人未嘗不以攬
權為先自古善致治之君亦未嘗不以攬權為先惟辟
作福惟辟作威惟辟玉食臣無有作福作威玉食者箕

子告武王之言也天下有道禮樂征伐自天子出至於無道則自諸侯大夫出者孔子垂戒後世之言也謂慶賞刑威曰君君能制命為義者左氏記時人之言也謂堂陞不可以相陵首足不可以相反者賈誼告文帝之言也此臣所謂善言治之人未嘗不以攬權為先也三皇官天下者攬福威之權以官之也五帝家天下者攬福威之權以家之也三王計安天下而歷年長且久者攬福威之權以安之也漢宣帝善法祖宗之君也然其

所以能守祖宗之法致中興之業者無他焉以其能革
霍光專政之弊躬攬福威之權而已觀其總核名實信
賞必罰齋居決事聽斷惟精而神爵五鳳之治號為吏
稱民安功光祖宗業垂後裔者蓋本乎此也光武亦善
法祖宗之君也然其所以能守祖宗之法建中興之功
者無他焉以其能鑒西京不競之禍躬攬福威之權而
已觀其總攬權剛明慎政體退功臣而進文吏戢弓矢
而散馬牛建武之政號為止戈之武系隆我漢同符高

祖者蓋本乎此也。唐明皇善法祖宗之君也。然其所以能守祖宗之法，致開元之治者，以其能革前朝權威干政之弊，躬攬福威之權而已。初，明皇銳於求治，姚崇設十事以要說之。其大槩則勸其攬權也。帝自謂能行，由是勵精為治，責成于下，而權歸于上矣。憲宗亦善法祖宗之君也。然其所以能守祖宗之法，致元和之治者，以其能懲前日沾沾小人竊柄之弊，躬攬福威之權而已。初，憲宗銳於致治，杜黃裳懼不得其要，勸其操執綱領。

要得其大者帝嘉納之由是勵精為治紀律設張赫然
號中興矣此臣所謂自古善致治之君未嘗不以攬權
為先也陛下懲前日權臣專政之久收還福威之柄運
獨化於陶鈞裁萬幾於獨斷天下翕然稱陛下為英主
凜凜乎漢宣帝光武唐明皇憲宗之上矣而臣尤勸陛
下攬權者非欲陛下衡石程書如秦皇帝而謂之攬權
也又非欲陛下傳食聽政如隋文帝而謂之攬權也又
非欲其強明自任親治細事不任宰相如唐德宗而謂

之攬權也又非欲其精於吏事以察為明無復仁恩如唐宣宗而謂之攬權也蓋欲陛下懲其所既往戒其所未然操持把握不可一日而少縱之使福威之柄一出於上不至於下移而已臣切謂陛下欲守祖宗之法莫若躬攬福威之權欲攬福威之權又莫若行陛下平日之所學五經泛言治道而春秋者人主攬權之書也陛下聖學高明緝熙不倦萬機之暇篤好此書固嘗親灑宸翰以書經傳刊之琬琰以詔學者矣邇者又命儒學

近臣於經筵講讀之是則夫子二百四十二年行事之迹固已默得於聖心之妙至於其間可為攬權之法者臣請為陛下誦之春秋書王曰天王者所以為人君法天攬權之法有書王不書天者所以為人君不能法天攬權之戒書朝書會者欲朝會之權必出於天子也書侵書伐者欲征伐之權必出於天子也書僭禮亂樂者欲其收禮樂之權也書僭賞濫罰者欲其收賞罰之權也權在諸侯則譏之如踐土之盟之類是也權在大夫

則刺之如雞澤之盟之類是也先王人而後諸侯者欲
權在王人也內中國而外四裔者欲權在中國也書盜
一字者所以戒小人之竊權也書閹一字者所以防刑
人之弄權也凡一字之褒重於華衮者皆所以勸人君
攬權以作福凡一字之貶重於斧鉞者皆所以勸人君
攬權以作威臣願陛下尊聖人之經行聖人之言以是
正天下之名分以是定天下之邪正以是成天下之事
業則何患乎不能監先王之憲遵祖宗之法革今日之

弊邪臣伏讀聖策曰仰惟祖宗以來立綱陳紀百度著
明細大畢舉皆列聖相授之模為萬世不刊之典朕纘
紹丕圖恪守洪業凡一號令一施為靡不稽諸故實惟
祖宗成法是憲是若臣有以見陛下謙恭仰畏不以聰
明自居必欲行祖宗之法以致中興之治也臣以謂陛
下欲法祖宗以致治又不可不法春秋以攬權臣謹按
春秋有變古則譏之之書有存古則幸之之書有復古
則善之之書經書初獻六羽者譏隱公不能守祖宗之

法而輕變先王之樂也書初稅畝者譏宣公不能守祖宗之法而輕變成周之徹也此所謂變古則譏之者也書猶三望者譏僖公不郊而幸其猶三望書猶朝于廟者譏文公不告朔而幸其猶朝于廟此所謂存古則幸之者也襄公十一年書作三軍者譏其變古也昭公五年書舍中軍者善其復古也此所謂復古則善之者也書曰無作聰明亂舊章詩曰不愆不忘率由舊章漢惠帝用曹叅守蕭何之法而海內晏然武帝用張湯取高

皇帝之法紛更之而盜賊半天下守祖宗之法者其治如此變祖宗之法者其亂如彼為人主者其可自壞其家法耶我太祖太宗肇造我宋之家法者也真宗仁宗至于列聖守我宋之家法者也先正大臣若范質趙普之徒相與造我宋之家法者在真宗時有若李沆王旦寇準在仁宗時有若王曾李迪杜衍韓琦范仲淹富弼之徒相與守我宋之家法者也側聞慶厯中仁宗出御書十三軸凡三十五事其一曰遵祖宗訓二曰奉真

考業三曰祖宗艱難不敢有墜四曰真宗愛民孝思感
噎故當時君聖臣良持循法度四十二年之間治效卓
然者蓋本乎此又聞熙寧中先正司馬光於經筵進講
至蕭何曹叅事謂叅不變何法得守成之道且言祖宗
之法不可變也異日呂惠卿進講立說以破之謂法有
一年一變者正月始和布法象魏是也有五年一變者
巡守考制度是也有三十年一變者刑罰世輕世重是
也光隨而折之曰布法象魏布舊法也非變也諸侯有

變禮易樂者王巡守則誅之王不自變也刑新國用輕
典亂國用重典平國用中典是謂世輕世重非變法也
觀二臣之言亦足以見其人之邪正矣陛下自即位以
來固未嘗不遵守祖宗成法比年有出於一時申請權
宜而行者致與成法或相牴牾邇者陛下諭羣臣謂
國家政事並宜遵守祖宗今又發于清問以求致治之
效臣有以見陛下得持盈守成之道真仁宗之用心矣
然臣復以攬權為言者蓋春秋譏時王失攬權之道故

諸侯遂有變法之弊今陛下欲守祖宗之法宜用春秋
賞罰之權以御之可也大臣有清淨如曹叅者宜命之
持循忠正如司馬光者宜俾之討論變亂如張湯者則
誅之異議如呂惠卿者則斥之如是則祖宗良法美意
可以垂萬世而無弊矣尚何患乎天下之不治哉臣伏
讀聖策曰畫一之法賞刑之具猶昔也而姦弊未盡革
臣有以見陛下欲行祖宗之法在乎明賞刑以革弊也
臣竊謂欲姦弊之盡革不可不法春秋以攬權蓋春秋

之法非孔子之法也成周之法也故杜預曰周公之志仲尼從而明之經有書賞者如錫命桓公錫命文公錫命成公之類皆所以譏時王之濫賞非周公之賞也有書刑者如殺其大夫放其大夫殺其公子之類皆所以譏時君之濫刑非周公之刑也時王失周公賞刑之法不能革當時之姦弊故仲尼以筆削之權代之善勸而淫懼焉我祖宗制賞刑之法載在有司畫一之章昭然可覩創之者如蕭守之者如曹未嘗有濫賞也而賞必

當乎功未嘗有淫刑也而刑必當乎罪歷世行之弊無
不草者蓋以聖祖神宗能攬權於上而羣臣能奉行於
下故也故司馬光自為諫官及為侍從嘗以人君致治
之道三獻之仁宗又獻之英宗又獻之神宗而其二說
則在乎信賞必罰也三宗既用其言以致極治矣光以
清德雅望執政于元祐之初躬行其言以草時弊進退
羣臣邪正之甚者十數人天下皆服其賞刑之當一時
之弊亦無不草者我三宗真盛德之君而光亦可謂救

時賢相也今者陛下躬親萬機一新時政斥逐姦邪登用者舊禁錮者釋告訐者誅茲賞刑之至公而草弊之甚大者也聖策猶以姦弊未革為憂者豈今日朝廷猶有僭賞濫罰如春秋時乎臣不敢不陳其大槩夫人主賞刑之大者莫若進退天下之人才今陛下每進一人必出於陛下素知其賢親自識擢可也不然則出於大臣侍從公心薦舉可也不然則采於輿論而天下國人皆曰賢可也苟不出於三者而一旦遽進之則議者必

曰某人之進也出於某人陰為之地也如是則一人之
濫進有以損陛下作福之權矣陛下每退一人必出於
陛下灼知其罪震怒而賜譴可也不然則出於諫官御
史公言論列可也不然則得於僉言而天下國人皆曰
有罪可也苟不出於三者而一旦遽退之則議者必曰
某人之退也出於某人陰有以中之也如是一人之誤
退有以損陛下作威之權矣昔舜舉十六相而天下悅
其賞之當去四凶人而天下服其罰之公陛下苟能以

祖宗制賞刑為法以虞舜用賞刑為心執春秋賞刑之
權以御之則何患乎姦弊之不革耶若夫有某勞進某
秩以為賞犯某事得某罪以為罰此特有司之職耳非
人主福威之大者臣不復為陛下言之也臣伏讀聖策
曰賦歛之制經常之度猶昔也而財用未甚裕臣有以
見陛下欲行祖宗之法在乎裕財用以經邦也臣竊謂
欲財用之有裕又不可不法春秋以攬權謹按春秋書
臧孫辰告糴于齊者譏莊公不節國用一歲不熟而告

急于外也書初稅畝者譏宣公不節國用變成周什一之法至於履畝而稅也書作丘甲者譏成公不節國用至於以丘而出甲也書用田賦者譏哀公不節國用至於用畝而出軍賦也春秋書告者不宜告書初者不宜初書作者不宜作書用者不宜用臣由是知春秋賦稅之書為人君節用裕財之訓明矣昔孔子對齊景公之問政不曰政在生財而曰政在節財有若對魯哀公之問年饑不告之以生財之術而告之以盡徹臣又知裕

國之術實在乎節用也側聞太祖皇帝有言曰我以四海之富宮殿悉以金銀為飾力亦可辦但念我為天下

守財耳豈可妄用古稱以一人治天下不以天下奉一

人嗚呼大哉言乎真可為萬世子孫保國之訓也又聞

仁宗聖性尤務儉約器用止於漆素衾褥止用黃絕嘉

祐間臨軒策士出富民之要在節儉以為御題時呂溱

賦曰國用既節民財乃豐仁宗悅之擢為第一觀仁宗

取士命題之意又真可為萬世子孫保國之訓也又聞

熙寧初司馬光王安石同對論及救災節用事安石曰
國用不足者以未得善理財者也光曰善理財者不過
頭會箕歛以盡民財民窮為盜非國之福安石曰不然
善理財者不加賦而上用足光曰天下安有此理天地
所生財貨萬物止有此數不在民則在官譬如雨澤夏
澇則秋旱不加賦而上用足不過設法陰奪民利其害
甚於加賦此乃桑洪羊欺漢武帝之言太史公書之以
見武帝不明耳司馬光之名言真可謂節用理財之法

聚斂毒民者之深戒也陛下自和戎以來兵革不用二
十年矣是宜倉廩富實貫朽粟陳如成康文景時可也
而聖策乃以財用未裕為憂雖臣亦竊疑之豈國家用
度之際有所未節乎奢侈之風有所未革乎不急之務
無名之費尚繁乎今賦入不及祖宗全盛之日而用度
不減祖宗全盛之時三年郊祀之禮所不可免者而臣
下賞賜之費有可得而省也不得已之歲弊所不可免
者而使命往來之費可得而省也百官之俸所不可免

者而冗官可得而省也六軍之養所不可免者而冗兵
可得而省也臣所謂用度之際有所未節者如此之類
不止乎此也朝廷往嘗屢有禁銷金之令矣而婦人以
銷金為衣服者今猶自若也又嘗有禁鋪翠之令矣而
婦人以翠羽為首飾者今猶自若也是豈法令之不可
禁乎豈宮中服浣濯之化衣不曳地之風未形於外乎
臣所謂奢侈之風有所未革者蓋在乎此也臣又聞之
道路謂遠夷外國有以無益之竒玩易我有用之資財

者池臺苑囿車騎服御有未能無所增益者中貴外戚
便嬖使令倡優伶官之徒有未能無非時賞賜者臣所
謂不急之務無名之費尚繁者蓋在乎此也昔漢文帝
躬行節儉以化民而海內至於富庶臣願陛下攬權于
上而草衆弊以文帝及我太祖仁宗恭儉為法以春秋
所書為戒則何患乎財用之不裕乎若夫自同於聚斂
之臣獻生財之術則臣不敢也臣伏讀聖策曰取士之
科作成之法猶昔也而人才猶未盛臣有以見陛下知

致治之道在乎得士而欲人才之盛如祖宗時也臣竊謂陛下欲人才之盛宜攬育才取士之權臣謹按春秋書作丘甲穀梁因論古者有四民而以士民為首范甯釋之曰士者治道藝者也又按經書單伯送王姬穀梁曰單伯者我之命大夫也范甯釋之曰古者諸侯貢士于天子大國三次國二人小國一人又按公羊春秋曰什一行而頌聲作何休因論及成周之時井田校室之制大學小學之法養士取士之說為甚詳又按經赦

許止之罪穀梁曰子生三月不免水火母之罪也羈貫成童不就師傅父之罪也就師傅學問無方心志不通己之罪也心志既通而名譽不彰朋友之罪也名譽既彰而有司不舉有司之罪也有司舉之而王者不用王者之過也春秋傷時王失育才取士之權而默寓其意於筆削之際公羊穀梁范甯何休之徒從而發明之亦可謂有功於風教矣我祖宗以來取士於科舉是古者諸侯貢士之法也養士於太學是古者校庠序之法也

又有制科以待非常之士是有取於漢唐盛世之法也
進士科或用詩賦或用經義雖更變不同而未嘗不得
人也大學之士或出於舍選或出於科舉雖作成不同
而亦未嘗不得人也二百年間名臣鉅儒建勲立業背
項相望莫不由此塗出可謂盛矣陛下往者雖在干戈
日不暇給之中而亦未嘗廢俎豆之事自偃兵以來復
興大學以養諸生其取士之科作成之法一遵祖宗之
舊恩甚渥也而聖策猶以人才未甚盛為憂者臣輒獻

攬權之說焉今取士之科作成之法雖曰猶昔而人才非昔者由福威之權下移於前日故也夫法之至公者莫如取士名器之至重者莫如科第往歲權臣子孫門客省闈殿試類皆竊巍科而有司以國家名器為媚權臣之具而欲得人可乎朝廷比因外臺之言例行駁放士論莫不稱快臣願陛下常攬福威之權以御之嚴詔有司謹取士之公法而無蹈往年之覆轍可也至所謂作成者蓋欲作成其器如鳶飛魚躍涵養其平日之剛

方而成就其異時之遠大者耳非取其能絺章繪句以
媒青紫也自權臣以身障天下之言路而庠序之士養
諛成風科舉之文不敢以一言及時務欲士氣之振可
乎臣聞嘉祐間仁宗以制科取士時應詔者數人眉山
蘇轍之言最為切直考官以上無失德而轍妄言欲黜
之獨司馬光慨然主其事仁宗曰朕以直言求士其可
以直言棄之邪擢寘異等此陛下取士之家法也臣願
陛下以仁宗為法以前日權臣之事為戒命庠序去諂

訛之規科舉草忌諱之禁有司取忠謹之論將見賢良
方正茂才異等直言極諫之士濟濟而出如仁宗時矣
尚何患人才之不盛乎臣伏讀聖策曰黜陟之典訓迪
之方猶昔也而官師或未勵臣有以見陛下知致治之
道在乎得人而欲官師之勵如祖宗時也臣竊謂欲官
師之勵宜攬黜陟賢否之權謹按春秋隱十一年書滕
侯至桓二年則書滕子范甯曰前稱侯今稱子者蓋時
王所黜隱二年書紀子至桓二年則書紀侯范甯曰前

稱子今稱侯者蓋時王所進臣切謂春秋時王不能黜陟諸侯是必天子以賞罰之權因其賢否而黜陟之也又按經書楚曰荊公羊曰荊者何州名也州不若國國不若氏氏不若人人不若名名不若字字不若子何休釋之曰聖人因周有奪爵之法故備七等之科以進退之臣是以知春秋實夫子黜陟之公法也故為臣而知春秋者則必為忠臣蓋春秋以責忠臣之至訓迪天下之為人臣者也為子而知春秋者則必為孝子蓋春秋

以責孝子之至訓迪天下之為人子者也我國家任官之法上自公卿百執事下至一郡一縣之吏無非以公道黜陟之固無異虞舜三載考績之法也有學以教之於未仕之前有法以禁之於筮仕之後無非以公道訓迪之固無異乎成周訓迪厥官之方也故當時為官師者罔不勉勵厥職坐廟堂之上與天子相可否者是宰相之勵其職也立殿陛之前與天子爭是非者是諫官之勵其職也言及乘輿則天子改容事關廊廟則宰相

待罪者是御史之勵其職也百官勵其職於朝守令勵其職於郡縣是以祖宗之世内外多任職之臣故其致治之效遠出漢唐之上今陛下任賢使能以建中興之治黜陟之法訓迪之方無非遵祖宗之時而聖策乃以官師未勵為憂者臣輒獻攬權之說焉今黜陟之法訓迪之方雖曰猶昔而治效非昔者由福威之權下移於前日故也夫法之至公者莫大乎黜陟而治亂之所繫者莫重乎官師曩者内外用事之臣多出乎權門之親

戚故舊朋黨文臣或非清流而濫居清要之職武臣或
無軍功而濫居將帥之任賄賂公行其門如市郡縣之
吏其濁如泥是皆官曹澄清時可堪一笑者至於一言
忤意雖無罪而亦斥睚眦之怨雖忠賢而必誅其一時
黜陟皆出乎喜怒愛憎之私無復有唐虞考績李唐四
善二十七最之法求欲其盡瘁勵職可乎若夫所謂訓
迪者蓋將以忠義訓迪之使其忘身徇國而已非欲訓
迪其巧進取善造請以事權勢也當權門炙手可熱之

時搢紳相率為佞之不暇孰有以忠義相訓迪者乎至於今日而官師猶未勵者以其承積習之後而餘弊未革故也陛下必欲官師咸勵厥職莫若大明黜陟於上而以黜陟之次者付之宰相又其次者付之吏部又其次者付之監司可也昔慶厯中仁宗黜夏竦等用杜韓范富以為執政以歐陽修余靖王素蔡襄為諫官皆天下之望魯人石介作聖德頌以揄揚之此陛下黜陟之家法也臣願陛下以仁宗為法以前日權臣之事為戒

執福威之大柄以為黜陟之法明忠孝之大節以為訓迪之方如是則尚何患乎官師之不勵職如祖宗時乎臣伏讀聖策謂姦弊未盡草財用未甚裕人才尚未盛官師或未勵其咎安在豈道雖久而不渝法有時而或弊損益之宜有不可已邪抑推而行之者非其人邪朕欲參稽典策之訓講明推行之要俾祖宗致治之效復見於今其必有道臣仰見陛下願治之切思慕祖宗之深欲聿追其盛德大業者可謂勤且至矣然臣已陳攬

權之說于前且以春秋為獻抑嘗聞先儒曾參有言曰
尊其所聞則高明矣行其所知則光大矣春秋之學陛
下既已深得之復能尊其所聞行其所知攬福威之權
以守祖宗之家法則賞刑當而天下悅矣姦弊不患乎
不革節儉行而天下化矣財用不患乎不裕取士公而
賢能出矣人才不患乎不盛黜陟明而邪正分矣官師
不患乎不勵祖宗致治之效又何患乎不復見於今邪
若夫所謂道雖久而不渝法有時而或弊損益之宜有

不可已者臣按先儒釋春秋有變周之文從周之質之說又有商變夏周變商春秋變周之說臣以謂春秋未嘗變周也特因時而救弊耳又嘗聞董仲舒之言曰先王之道必有偏而不起之處故政有眊而不行救其偏者所以補其弊而已矣我祖宗之法譬猶大厦弊則修之不可更造苟不知遵守而輕務改更臣恐風雨之不芘也損益之宜有不可已者臣願以仲舒補弊之說為獻可乎若夫所謂推而行之有非其人者臣按春秋書

乃一字如公子遂如齊至黃乃復之類穀梁釋之曰乃者亡乎人之辭也蓋言任用不得其人耳又嘗聞荀卿之言曰有治人無治法夏商周之法非不善也苟得其人監于成憲常如傳說之言遵先王之法常如孟子之言率由舊章常如詩人之言則夏商周雖至今存可也漢唐之法亦非不善也苟得其人常如曹參之守法宋璟之守文魏相李絳之奉行故事則漢唐雖至今存可也祖宗之法非不甚善也苟得其人常如司馬光之徒

持守成之論則垂之萬世與天地並久可也陛下既知前日推而行之非其人矣則今日又不可不慎擇焉臣願以荀卿有治人之言為獻可乎若夫參稽典策之訓則有歷朝之國典在焉祖宗之寶訓政要在焉有司之成法在焉朝廷之故事在焉陛下宜詔執政與百執事之人參稽而奉行之可也若夫講明推行之要則無若乎攬權陛下提綱振領而以萬目之繁付之臣下可也陛下終策臣曰子大夫學古入官明於治道蘊畜以待問

久矣詳著于篇朕得親覽此陛下導臣使言臣不敢不盡言也臣聞人主開求言之路必將有聽言之實人臣遇得言之秋不可無獻言之誠蓋求言之路不常開而得言之秋不易遇今陛下開求言之路而臣遇得言之秋陛下有聽言之實臣其可無獻言之誠乎臣復有一言以為陛下獻者欲陛下正身以為攬權之本也按春秋書正者杜預謂欲其體元而居正公羊又有君子大居正之說謂正心以正朝廷正朝廷以正百官正百官

以正萬民者董仲舒之論正也謂人君所行必正道所
發必正言所居必正位所近必正人者劉蕡之論正也
臣觀自古人君能正身以化下者莫如周文王不能正
身以化下者莫如漢武帝文王宅心於正道之中其勤
勞則日昃不遑暇食不敢盤于游田以庶邦萬民惟正
之供故能刑于寡妻至於兄弟以御于家邦見于思齊
之詩在位之臣皆節儉正直見于羔羊之詩人倫既正
朝廷既治天下純被其化又見于騶虞之詩文王能自

正其身而其下化之如此若夫武帝則不然其所以自治其身與其下應之者皆不正也帝好諛也故公孫弘曲學以應之帝好刑也故張湯曲法以應之帝好利也故孔僅桑弘羊以剝下益上應之帝好兵也故衛青霍去病以拓土開疆應之帝好夸大也故司馬相如作封禪書以應之帝好神仙也故文成五利之徒以左道應之武帝不能自正其身而其下應之如彼臣願陛下以文王為法以武帝為戒端厥心居以為化本非正勿視

非正勿聽非正勿言非正勿動其用人也不必問其才
不才而先察其正不正是果正人也其進則為治之表
其可以其才不足而不與之進乎是果不正人也其進
則為亂之機其可以其才有餘而使之進乎其聽言也
必觀其言之是與非斯可以見其人之邪與正有遜志
之言必將察之曰彼何為而投吾之所好哉是必不正
人之言也是言之有害於我者也其可以其遜吾志而
受之邪有逆耳之言必將察之曰彼何為而犯吾之所

惡哉是必正人之言也是言之有益於我者也其可以其
逆吾耳而不受邪左右譽言日聞必察之曰是必不正
人也是必阿大夫之類也是必善結吾左右以求譽者
也退之可矣左右毀言日聞必察之曰是未必非正人
也是必即墨大夫之類也是必不善結吾左右以致毀
者也進之可矣如是則一念慮無非正心一云為無非
正道左右前後侍御僕從罔匪正人殆見四方萬里風
行草偃莫不一於正矣臣願陛下以是為攬權之本而

又任賢以為攬權之助廣覽無聽以盡攬權之美權在
陛下之手則所求無不得所欲皆如意雖社稷之大計
天下之大事皆可以不動聲色而為之况區區四者之
弊尚何足以軫淵衷之念哉臣聞主聖臣直惟陛下赦
其狂愚不勝幸甚臣昧死臣謹對

梅溪集廷試策

欽定四庫全書薈要卷一萬五千八百三十三

集部

梅溪集奏議一

宋 王十朋 撰

輪對劄子三首

臣一介小臣不識忌諱不知朝廷事體愛君憂國出於天性妄懷發不恤緯之心竊聞道路洶洶咸謂敵情叵測有南下牧馬巢穴汴都窺伺江淮之意廟堂之上帷幄之臣必有料敵制勝之策臣不可得而知然議者以謂邊奏有警則羣臣失色相顧傳聞稍息則恬然便以

為安且謂敵有內難勢必不來夫不恃我之有備而幸敵之有難其謀國之術亦疎且殆矣自建炎至今敵未嘗不內相殘賊也然一主斃一主出其勢愈熾曷嘗為中國利哉要在所以自備者如何爾我有先備敵雖強而不足憂我苟無備敵雖有難幸之何益彼或不以有難為畏乘我稍怠長驅而來其將何以禦之耶臣謂今日禦敵之策莫急於用人用人之要莫先乎人望蓋知人之術自古所難蕭何不生孰人識韓信於未知名之